

मार्निंग डोगरी न्यूज़ बुलेटिन, समे. **09-20** Hrs

<><><><><><>

Headlines

- लेफ्टिनेंट गवर्नर मनोज सिन्हा होरें राष्ट्र दी खुशहाली लेई पूरी समर्पण भावना कन्नै अपनी जिम्मेदारिएं गी निभाने दे महत्वै पर जोर पाया ऐ।
- मुख्यमंत्री ओमर अब्दुल्ला होरें आखेआ ऐ सरकार गुलमर्ग च स्कीईंग सरबन्धी ढांचे गी बढ़ावा देने लेई निजी निवेशकें कन्नै गल्लबात करै करदी ऐ।
- जम्मू-कश्मीर विधानसभा दे बजट इजलास कोला पैहले स्पीकर अब्दुल रहीम राथर होरें औंदी 27 फरवरी गी सभ्मनें पार्टिएं दी इक बैठक सददी ऐ।
- सेहत ते मेडिकल शिक्षा मंत्री होरें आखेआ ऐ जे सरकार समूलचे जम्मू-कश्मीर च पुज्जत आहली ते मय्यारी सेहत दिक्खभाल स्हूलतां जकीनी बनाने पर ध्यान केन्द्रित करै करदी ऐ।
- आईसीसी चैंपियन ट्राफी क्रिकेट टूर्नामेंट च कल भारत नै पाकिस्तान खलाफ 6एं विकटें कन्नै बड्डी जित्त दर्ज कीती। भारत दी तरफा विराट कोटली नै शतक बनाया।

<><><><><><>

LG Raj Bhawan

लेफ्टिनेंट गवर्नर मनोज सिन्हा होरें समाज ते राष्ट्र दी तरक्की लेई पूरी समर्पण भावना कन्नै अपनी जिम्मेदारिएं गी निभाने दे महत्वै उप्पर लोऽ पाई ऐ। एलजी होरें विश्वास जताया ऐ जे राष्ट्र दी खुशहाली लेई हर कुसै गी पूरी जिम्मेदारी कन्नै कम्म करने लोड़चदे न। जंदे रोज जम्मू आहले राजभवन च अरुणाचल प्रदेश ते मिजोरम दे बसनीकें गी संबोधित करदे होई श्री सिन्हा होरें सभ्मनें दे विकास दी जरूरतै उप्पर लोऽ पाई ते आखेआ जे इस गल्लै गी पक्का कीता जाना लोड़चदा ऐ जे विकास जात्तरा च कोई बी पिच्छे नेई रेही जा। एलजी होरें दौनें गै राज्ये दे तेज रफ्तार विकास लेई अपनियां शुभकामनां दित्तिआं।

<><><><><><>

CM Investors

मुख्यमंत्री उमर अब्दुल्ला होरें आखेआ ऐ जे सरकार किश निजी विदेशकें कन्नै गल्ल करियै गुलमर्ग च मशहूर Sking थाहरें पर ढांचागत सहूलतें च बाद्धा करने लेई बचार करा'रदी ऐ। उनें आखेआ जे हुन Heliskig ते सफारी लेई हैलीकाप्टर गुलमर्ग च म्हेशां उपलब्ध रौहग। बारामुला च पत्रकारें कन्नै गल्ल करदे होई मुख्यमंत्री होरें आखेआ जे जम्मू कश्मीर केबल कार कारपोरेशसन नमीं केबल कार परियोजना दी योजना बना'रदी ऐ। घट्ट बर्फबारी दे बावजूद गुलमर्ग Sking करने आले नंद लै'रदे न ते Helisking गी चालू होई गई ऐ। खेलो इंडिया गेंस गी अगड़ेपाए जाने बारे बोलदे होई उनें आखेआ जे 26 फरवरी थमां मेद ऐ जे बर्फबारी होग ते मगरा स्थिति दा आंकलन करियै गै कोई घोषणा कीती जाग। उनें आखेआ.....

<><><><><><>

Speaker All Party Meet

औंदी 3 मार्च थमां शुरु होने आहले जम्मू-कश्मीर विधानसभा दे बजट इजलास कोला पैहले स्पीकर अब्दुल रहीम राथर होरें औंदी 27 फरवरी गी सभनें पार्टिएं दी इक बैठक सद्दी ऐ तांजे सदन दे कम्मैकाजै गी बवस्थित ढंगै सिर तोढ़ चाढ़ना जकीनी बनाया जाई सकै। इस बैठका च नेशनल कांफ्रेंस, बीजेपी, पीडीपी ते पीपुल्स कांफ्रेंस दे नेता हिस्सा लैउन। 43एं दिनें दा एह बजट इजलास हंगामेदार रेही सकदा ऐ कीजे बरोधी धड़े नै केई सारे मामलें गी लेइयै सरकार गी घेरने दी तैयारी कीती दी ऐ। जित्थे इक बक्खी मुख्य बरोधी दल बीजेपी आसेआ सत्ताधारी पार्टी नेशनल कांफ्रेंस गी ओहदे चुनावी घोषणा पत्तर च कीते गेदे वादे ते शासन सरबन्धी मामलें गी लेइयै घेरने दी तैयार कीती गेदी ऐ उत्थे गै पीडीपी ते पीपुल्स डेमोक्रेटिक पार्टी इक बारी फही दफा 370 दा मुद्दा पुट्टने सने शराब दी बिक्री ते खपत पर पाबंदी ते होरनें मामलें गी बी पुट्टी सकदी ऐ।

<><><><><><>

HM Watan Ko Jano

गृहमंत्री अमित शाह होर अज्ज नमीं दिल्ली च जम्मू कश्मीर दे युवाएं कन्नै गल्लबात करगंन। युवा संपर्क तैह्त “वतन को जानो” कार्यक्रम दे चलदे एह युवा गृहमंत्री हुंदे कन्नै मलाटी करगंन। जम्मू कश्मीर बक्ख-बक्ख स्कूल दे आर्थिक तौर पर कमजोर 250 बच्चें गी प्रदेश दिएं शिक्षा मंत्री सकीना इत्तू होरें रवाना करोआया हा। एह दल 13एं दिनें दे दौरे पर ऐ। इस दल गी दिल्ली, जयपुर ते अजमेर लेई रवाना कीता गेआ हा। समाज कल्याण मैहकमे ते गृह मामले सरबन्धी मंत्रालय दे सैह्योग कन्नै इस दौरे दा सरिस्ता कीता ऐ।

एहदा मकसद युवाएं गी भारत दी समृद्ध सांस्कृतिक विरासत बारे जानकारी बनाना ते राष्ट्रीय एकता दी भावना गी बल देना ऐ।

<><><><><><>

Itoo Healthcare

सेहत ते मैडिकल शिक्षा मैहकमे दी मंत्री सकीना इत्तू होरें कुलगाम जिले दे लामर ते चोगाम ग्राएं च अज्जै कल्लै दिएं सुविधाएं कन्नै लैस नमिं किस्में दे 2 बुनियादी सेहत केन्द्रें दा उद्घाटन कीता। इस मौके पर बोलदे होई मंत्री होरें आखेआ जे सरकार सेहत सरबंधी दिक्खभाल आली सेवाएं गी बेहतर करने लेई खास करी ग्रामीण इलाकें च होर मजबूत करने लेई वचनबद्ध ऐ। उनें आखेआ जे इनें सुविधाएं कन्नै मकामी बसनीकें गी फायदा होग ते दूरी पर स्थित अस्पतालें पर निर्भरता घट्ट होग। नशीले पदार्थों दी युवाएं च बधदी कबैतु बारे चिंता जाहर करदे होई मंत्री होरें जोर देइयै आखेआ जे इस बारे लोकें च जागरूकता पैदा करने दी लोड़ ऐ ते इस माड़ी कबैतु कन्नै निबड़ने लेई सब्बनं दी शमूलियत बड़ी लाजमी ऐ। मीछिया कर्मिं कन्नै गल्ल करदे होई मंत्री होरें आखेआ.....

<><><><><><>

Forest Saplings

जम्मू-कश्मीर दे जंगलात मैहकमे नै खित्ते च सैलतन बधाने ते जलवायु परिवर्तन दे माड़े असर दा मुकाबला करने दे मकसद कन्नै औंदे मार्च महीने दे अखीरै तोहड़ी डेढ़ करोड़ रुक्ख-बूहटे लाने सरबंधी इक महत्वकांक्षी योजना रम्भी ऐ। सोशल फारेस्टरी विभाग नै जांगली इलाकें दे बाहर बी सैलतन बधाने दे मकसद कन्नै चिनार दे बूहटे लाने दा अभियान रम्भेआ ऐ ते एहदे लेई मुकामी करसानें गी अपने कन्नै जोड़ेआ जा'रदा ऐ। जांगली इलाकें च अगग लग्गने दिएं घटनाएं बारै बोलदे होई जंगलात दे प्रिंसिपल चीफ कंजरवेटर एस.के. गुप्ता होरें आखेआ जे एह घटनां, सोक्के ज्नेय हालात दरान हुंदिआं न। ऊआं उ'नें इब्बी आखेआ जे सरबंधत अमला इस चाल्ली दिएं घटनाएं उप्पर तुरत काबू पाने लेई पूरी सक्रियता कन्नै कम्म करना ऐ। उ'नें लोकें गी बी गुजारिश कीती जे ओह बी रुक्ख-बूहटे लाने दे इस अभियान च शामिल होन ते सैलतन बधाने च अपना जोगदान देन। उ'नें आखेआ जे एसएसआरबी दी भर्ती राहें मैहकमे आसेआ अपने अमले च बाददा करने दी दिशा च बी तेजिआ कन्नै कम्म कीता जा करदा ऐ।

<><><><><><>

Divya Kala Mela

जम्मू दी गुलशन ग्राउंड च आयोजित दिव्य कला मेला 2025 अज्ज 10एं दिनें दे शानदार जतन दे मगरा संपन्न होआ करदा ऐ। एह मेला जंदी 14 फरवरी गी शुरू होआ हा ते इन्नै 20 शा मते राज्ये थमां आए दे 100 शा बद्ध दिव्यांग कारीगरें गी दस्तकारी, कपड़े—टल्लें, गैहनें—बंदें ते पर्यावरण दे अनुकूल उत्पादें गी प्रदर्शित करने लेई इक सांझा मंच उपलब्ध करोआया। इस दरान लोकें गी उत्थे सांस्कृतिक पेशकारियें दा नंद लैने सने, मुकामी व्यांजनें दा सोआद चक्खने दा मौका बी मिलेआ। इस सरबंघै च अपने तजुर्बे सांझे करदे होई मुकामी कारीगरें आखेआ

<><><><><><><>

Cricket

आईसीसी चैंपियन्स ट्रॉफी दे कल दुबई च खेड्डे गेदे इक मैच च भारत नै पाकिस्तान गी 6एं विकेटें कन्नै हराई दित्ता। टॉस जित्तिथै पैहले बल्लेबाजी करदे होई पाकिस्तान दी पूरी टीम 241 रंज गै बनाई सकी। जित्त लेई लोडचदे 242 रंज दे लक्ष्य दा पिच्छा करदे होई भारती टीम नै शानदार प्रदर्शन करदे होई मैच अपने नां करी लैता। भारत दी तरफा विरोट कोहली नै शानदार शतक बनाया जिसलै जे श्रेयस अय्यर नै 56 ते शुभतन गिल नै 46 रंजें दा योगदान दित्ता। सउद शकील नै 62 रंज बनाए। भारत दी तरफा कुलदीप यादव नै 3 विकेटां लैतियां ते हार्दिक पांडया नै 2 विकेटां लैतियां।

<><><><><><><>

Weather

मौसम विभाग नै अज्ज मौसम खुश्क रौहने दी पेशगोई कीती ऐ। 25 थमां 28 फरवरी बश्कार हल्की थमां दरम्याने दर्जे दी बरखाते बर्फबारी होई सकदी ऐ। मौसम विभाग नै मोसम बदलोखडा रौहने दी पेशगोई कीती ऐ। कश्मीर ते जम्मू डिवीजन च किश थाहरें भारी बरखा ते बर्फबारी दी पेशगोई कीती ऐ। विभाग नै परामर्श जारी कीता ऐ जे इस दरान यातायात पर असर पेई सकदा ऐ खास करी साधना पास, राजदान पास, सोनामर्ग—जोजिला—गुमरी, मुगल रोड ते सिंथन पास बगैरा आली थाहरें पर। सैलानिएं, यात्रिएं ते ट्रांसपोटरें गी अपनी योजना एहदे मूजब गै बनाने लेई आखेआ गेआ ऐ।

<><><><><><><>